



Na međunarodnom graničnom prelazu Rača Otkriveno 19.900 falsifikovanih dolara

Policijski službenici Jedinice granične policije Bijeljina jučer su u 9.30 sati na ulazu u BiH, na međunarodnom graničnom prelazu Rača, prilikom kontrole mercedesa registarskih oznaka Republike Slovenije otkrili 19.900 američkih dolara u apoenima od 100 dolara, za koje postoji sumnja da su falsifikovani. U vozilu je prethodno izvršena granična kontrola državljana BiH: vozača B. N. i suvozača B. S. koji su po nalogu tužioca Tužilaštva BiH, zajedno sa

novcem, isti dan predati pripadnicima SIPA.

N. B. i S. B, koji su sa gomilom lažnog novca pokušali iz Srbije da uđu u BiH, očito nisu znali da su se nalazili na potjernici MUP-a RS-a i na listi osoba za kojim je tragala SIPA. Prilikom kontrole graničari su ovo odmah uočili i uhapsili njih dvojicu. Odmah su obaviještene pripadnici SIPA koji su nakon dolaska na granični prelaz pretresli mercedes i u njemu pronašli lažni novac.

Osobe lišene slobode privedene su u službene prostorije SIPA, gdje je nad njima izvršena kriminalistička obrada, nakon čega su uz izvještaj o počinjenom krivičnom djelu predati Tužilaštvu BiH na dalje postupanje.

U nastavku istrage pripadnici SIPA moraće ostvariti saradnju sa policijom susjednih zemalja kako bi se pokušalo utvrditi gdje je štamparija pronađenog falsifikovanog novca.

D. P.